

四庫全書

集部

欽定四庫全書

集部

攻媿集卷十三

詳校官石中允臣薩敏

主事臣呂雲棟覆勘

總校官庶吉士臣倉聖脉

校對官中書臣牛稔文

謄錄監生臣任應銑

欽定四庫全書

政魏集卷十

今體詩

南山廣莫軒

廣莫垂風隘九州
亂山無數點平疇
一千里外在吾目
三十年來無此游
地下天高俱歷歷
鳶飛魚躍兩悠悠
昌黎費盡南山句
曠遠還能似此不

宋樓鑰撰

送趙至道節推

君來入幕恰三年我幸投閒識此賢
婉畫時時因事見素風凜凜信家傳
易林律本君須寄月窟天根語是圓
問訊難兄無恙否相忘千里各瀛壖

湖亭觀競渡

涵虛歌舞擁邦君兩兩龍舟來往頻
閏月風光三月景二分煙水八分人
錦標贏得千人笑畫鼓敲殘一半春
薄暮游船分散去尚餘簫鼓繞湖濱

龍潭方丈

又因寒食此中來
牕戶虛明絕點埃
山裏春風無間斷
海棠開過棣棠開

弔僅老塔

僅老相從五十期
來瞻遺塔我心悲
當時舊話無人說
空有門前洗鉢池

夜攜家登南渡橋

幾過長橋下清宵
得意行風高江水
急月上海潮生空

迴寒逾峭更深境過清扁舟難久駐轉柁問歸程

題夢月上人送鴻小樓

雨洗春山空翠新登樓不見送鴻人
薜蘿清夜月依舊無復新詩泣鬼神

贈于湖劉相士

自笑今年卦氣闌壯心銷盡鬢毛殘
明知七十無多子只問何時可掛冠

五月望月蝕歷家又言六月朔日蝕

閭巷夜爭呼相傳救望舒偶因風暫破真似月之初孰
謂臺能瞎端知歷不疎太陽交蝕近試看更何如

題賀監李謫仙二像

不有風流賀季真更誰能識謫仙人金龜換酒今何在
相對畫圖如有神

斗酒澆詩動百篇鑑湖牛渚兩俱仙早知今日猶相對
不向稽山回酒船

病後戲作

河魚腹疾未全除一飯充飢不願餘縱有珍羞難下飭
真成頓頓食黃魚

枕上

不守庚申不坐禪老來觸事總悠然天明門外無來客
儘好蕭蕭聽雨眠

謝蔣行之送菊

秋老懷情儘自寬眼前只欠菊花團分來三徑雙株秀
先得重陽兩日看玉輦金輦無限態風高露冷不勝寒

幽人相對成清伴正爾落英供夕餐

廳事落成老母置酒喜而成詩

數椽增葺苟全時我愛吾廬喜得歸
兒輩粗能勤父蠱
老天無不費心機年來每愧踰初望
病裏尤知悟昨非
從此蕭然無一事但當日舞老萊衣

十月十七日夜

蟄蟲坯戶六經旬掣電驚雷若暮春
震起昆蟲千百億
不知何處更容身

織錦綦盤

錦城巧女費心機織就一枰如許齊彷彿回文仍具體
縱橫方罫若分畦爛柯未易供仙奕畫紙何須倩老妻
如欲拈綦輕且稱當求白象與烏犀

叔韶弟以退堂洪老詩來寄謝

不受人天供甘心樂隱居空窮千里目笑擁一樓書
攻媿老無用退堂閒有餘相望可杭葦何日訪吾廬

寄題正卿通判可高亭

樟坡直上可高亭未見高高祇見名想像豈能勝一覽
登臨安得快雙明大龍湫下聽雷吼白石岩頭看日生
咫尺好山隨杖屨自應老筆擅詩聲

中秋次從子涇韻

雨餘不見日西沉將謂中秋又作陰佳月忽開千里影
騷人滿慰一年心掃除塵翳風難動滓滅太清雲尚深
坐待寒光誰會此阿咸為我發微吟

楊花

杜門無緒看芳菲
見說楊花滿路飛
謝汝不隨人冷暖
因風翻舞到柴扉

送趙南仲丞漂水

不用忽忽恨別離
版輿春晝綵衣隨
往題斯立藍田壁
更訪清真漂上詩
公事毋庸犄牙角
鄰封真是和埧篲
日哦新句頻相寄
明月清風慰所思

戲題龍眠馬性圖

狗子已知無佛性
馬又何曾有性來
伯樂若來休著眼

任他騏驥混鴛鴦

他山

素蛺蝶橫臥作雷吼日射細鱗銀色光安得此身如白鷺
儵然終日在梅梁

過盡水禽竝野鳬風標惟許一春鉏可憐久立梅梁上
不為谿光祇為魚

小酌元衛弟聽雨

小閣臨流暑氣清藕花的的照人明移牀更近欄邊坐

要聽碁聲雜雨聲

瀟再往剡中念之尤切作詩寬之

剡縣不為遠丞官勿謂卑鼓盆知愛重去國倍行遲
堂上森三老房中秀一兒加餐了官事莫賦悼亡詩

觀雲寄簡講師

蒼狗哦然又白衣來從何處去何歸無心出岫還歸去
莫向秋風說是非

過故家

團團桂樹擁簷牙
舊日輕黃滿樹花
惆悵秋清無一葉
空餘枯枿縋寒瓜

題從子決娛親

阿戎築屋為娛親
野草閒花日日新
我奉版輿來舉酒
祈君親壽似夫人

丹桂

碧雲步輦紫金粧
風靜秋高千萬枝
嬌額塗黃元自好
是誰深傳蜜臙脂

下元日暖甚夜風雨大作早微雪從子溱以醑醑
來

眼明喜見早醑醑
牕外風號集霰時
梅蘂已慙前臘破
芳心休用怨春遲
納涼除夜昨幾似
見雪芭蕉今不疑
若使洛人真得此
應須更詫百宜枝

送朱叔正守南劍

舍人簪筆舊甘泉
家學相傳子姓賢
未羨夾河為太守
阿連剖竹向封川

檇李曾蜚劇聲貳車仍贊虎頭城朱轡小試承流手
要繼桐鄉循吏名

萬竹蟠山喉不乾兩龍潛水氣猶寒郡齋見說真圖畫
公退何妨一倚欄

下水上山腰帶州人家無數起危樓遨頭不用喧簫鼓
祇把清詩紀勝游

同盟東下或西征老我惟知管送迎祇恐政成登省戶
未容歸騎向西城

名畫法書知幾編捧銓寧復計求田摩挲贖買新文字
歸滿米家書畫船

送杓孫隨侍上虞

阿斗生來十五年未曾一日去翁前聞詩勿廢家庭問
習吏仍求城旦篇婚宦有涯真是幸巾箱所蓄要相傳
柴爨雖小性非魯口授詩書加愛憐

戲作

二子為丞分越邑女兒隨壻過江南笑言屋裏成岑寂

匹似當初只住庵

諸瑩拜掃晚歸長汀

雨意早垂垂寒雲晚更低空中時散點道上不成泥綠
柳桃相映黃花麥與齊紆回餘百里喜見舊松隄

送朱季公守封川

韶陽生長十餘年城郭重經固宛然歎息紫薇仙去久

尚餘遺墨照山川

先舍人居韶十四
年季公生于壬戌

桐鄉漢有大司農封守今推陳秀公君向邦人著遺愛

近追相業遠家風

陳秀公曾守封川有遺愛

鄉評久說鴈行賢
剖竹封川與劔川
不用對牀風雨約
政成問取舊青氈

吾鄉棊社寢凋零
賴有朱家好弟兄
舉酒看看故人少
陽關莫唱斷腸聲

妙舞清歌有二姝
後堂曾見繡羅襦
嶺南太守風流勝
不用歸舟載綠珠

以玉蘭贈王習甫

一種香蘭玉色新
仙家分得藥宮春
調高韻勝誰能稱
付與能言解語人

華屋翬飛慶事繇
芝蘭玉樹喜庭前
似聞楚畹芽初茁
便看藍田生晚煙

送趙清臣宰姚江

玉立君家好弟兄
藍田風采照花城
版輿壽母人間盛
千里何曾去送迎

鄞江水與舜江通
久矣威名滿一同
試問何時到封部

數聲柔櫓一帆風

長江東去跨虹橋千丈橫隄捍海潮更向燭谿圖永利
坐令百里沸歌謠

才刃恢恢妙撥煩鄰封撫字尚何難更能觸事加長慮
自有甘棠向後看

歸家故步懶重尋藏拙年來恐不勝短棹有時乘興去
徑登竹所聽鳴琴

楊花

雨壓輕寒春較遲
春深不見柳綿飛
忽然飛入閒庭院
疑是故人何處歸

柳綿無數糝枝頭
日暖隨風撲畫樓
萬象可觀惟有雪
喜看晴晝滿空游

為我輕攀綠柳枝
帶花低護笑攜歸
日長深院微風動
要看鬆綿當面飛

野芳庭草是生涯
老去祇宜閒在家
幾日惜春留不住
小鬟為我拾楊花

送王伯奮守筠陽

三槐名德萃清門，七葉為州賴有君。
道院無忘山谷賦，郡齋當繼潁濱文。
君應膝上鄰文度，我向東牀憶右軍。
振起家聲差易耳，便看奏最躡青雲。

別王恭叔

兩兒雖近隔江潮，賴有王郎慰寂寥。
遠侍雙親官道院，為同盡室餞西橋。
腦脂遮眼最關心，客路尋仙勿憚遙。
別後飛緘問安否，數來谷口訪山樵。

別長女涓

老我年來百念輕
文姬助我以琴鳴
等閒相對成三弄
遊戲俱彈似一聲
舉酒不堪千里別
登途知用幾程行
郡齋自是神仙窟
會有堦庭玉樹生

趙資政園梅篆

小徑回環里許長
寒梅森列間疎篁
路如古繭縈繆篆
身似輕烟繚印香
九折坂中經蜀險
八盤嶺上趁朝忙
歸來遊戲通幽處
笑看危途幾太行

示從子

東院敲棋西院琴固知猶勝別勞心少年不比老癡叔
且向書牕惜寸陰

贈畫梅呂生

西湖處士賦疎影未似希貞好樂章豈是無情甘澹泊
受他風月幾淒涼

蒲自剡州寄水晶蒲萄

馬乳從他堆滿盤未如清嚼水晶寒固知一縣蒲萄熟

不用勞人數問安

送汪莊仲赴江東倉幕彊仲荆門簽判

不見適齋老于今三四秋弟兄登宦路親黨駐行舟老
病無詩思衰懷重別愁外家門戶盛勉力紹箕裘

外氏蒙恩厚文昌獨我知居慚酷似舅喜有寧馨兒遇
事行方便裊身謹護持公餘定多暇黃卷有餘師

早歲過秋浦貪程不入關君今參儉幕時得上齊山膚
使資關決賢俟伴宴閒好音頻寄我藉此一開顏

之子游何許平州更玉州山川稱勝絕幕府信風流翠巘寒逾秀金蓮夜不收天涯念鄉國少上仲宣樓

見說荆門地如門蔽楚荆舊時為內郡今日號邊城但守平平策母求赫赫名勉哉關決際從此振家聲

送元積弟赴淮東總屬

南徐來往飽經過總餉賓寮入禮羅子去幸陪鄒湛輩君今還是伯休那金閨通籍時方可鐵甕名城景最多我有淨名遺記在試從萬井訪維摩

十人兄弟五人存心事方欣得細論可但衰遲憐遠別
只因喜懼有慈尊倚門何止期吾子發策還知望好孫
從此三年風雨夜寂寥碁局與清樽

陳君舉既亡汪文子攜其所作春秋後傳及送行
詩來次韻

名盛望有備枝披實亦繁無由究賢業猶幸立斯言書
在經逾顯人亡道更尊九京如可作與子共南轅

送趙伯藏倅永嘉

當代投閒老吏師佳兒官業具而微已煩潘令宰花縣
正要王祥康海圻得助江山詩興逸平分風月羽觴揮
安車何日迎清獻又向堂前戲綵衣

分教分符恰五年異鄉每若故鄉然歸來幾作池塘夢
送別欲隨騶御仙目斷甘林應飽熟手栽樂實想芳鮮
邦人若問老州牧為說清霜繞鬢邊

晝寢

彈徹悲風更廣陵滄浪一為濯塵纓邯鄲枕上夢初覺

喜聽簷間風雨聲

喚仙閣

上到危層莫喚仙
纔凭橫檻挹江天
江天如許來供眼
何用王喬更偓佺

多少尋仙更不還
渺茫竟墮有無間
使其真有毋庸喚
仙自層城我自山

犯暑來登覽
松風為洒然
龍泉登古井
虹影臥中川
萬簇寒林秀
四山秋色鮮
詩翁不可見
況敢喚飛仙

送趙敏之丞彭澤

淮甸歸來涉學深，孤雲又出亦何心。
公餘巖下讀書去，遠繼風流石橘林。

淵明事晉肯臣劉，仁傑忠良不附周。
見說三賢參羽士，

尉斯光

盍將吳簿配蘋羞

南唐吳舉為彭澤主簿，有高節，見六一集。

陶令居官八十日，始為督郵方賦歸。
君家門戶要興起，未用飄然詠式微。

阿虞試晬戲作

阿虞匍匐睚盤中事事都拏要學翁最是傳家清白處
不將雙手向頑銅

贈別盧甥申之歸吳門

千里何妨命駕遲晤言未厭已西馳子休重賦瓊瑰贈
我亦懶歌親戚離好向清江論樂府更從葉子說新詩
樂閒引紙五十尺為篆離騷繼李斯

又謝申之示詩卷

不見賢甥十一年新詩示我百餘篇古風已喜能行意

近體尤欣細屬聯宅相真成珠在側冷官休歎坐無氈
作詩勿謂今餘事更下功夫繼玉川

送秦仲防通判

清德曾瞻啓慶碑孫曾清更畏人知祇緣一介弗輕取
坐使斯民不忍欺瀨水家傳御書卦宣城手寫送行詩
典型尚繼金鑾舊馬氏一門誰白眉

題輿再到海東涯嗜學深于入幕時一字未通終不置
五行俱下尚嫌遲情親端有卜鄰意別後空勞望月思

老我無因可重見祝君來此擁旌麾

謝剡中沈元龍惠詩

東陽何事到東州百語曾無一語酬
深羨松筠無敗葉自言蒲柳已先秋
千金既覺成虛擲雙壁還驚又暗投
別後未知何日見但將吾道付滄洲

謝舒景叔寫照見贈

誰寫衰容入畫圖本來面目舊形模
幾年老瘦鬢如雪不道今吾非故吾

庭前一蓮著花

門外荷蓮浥露華
綠雲平地擁秋霞
病夫不耐出門去
且看庭前第一花

消月下鼓琴用漳韻

老穉團樂鯉在庭
文姬為鼓玉琴聲
起來同作悲風曲
倍覺先秋月影清

國仲觀遷居尹隩訪別

晚年未定一枝巢
到處葢頭無把茅
又欲浮家過尹隩

何殊樂道向莘郊君今去此難招隱老更從誰可定交
見說衡門臨野水秋深容我去推敲

仲觀有詩來謝次韻

危機屢見劒頭炊喜及桂冠神武時從此含藏三寸舌
算來插得幾張匙讀書牕下頻勤習攻媿庵中老住持
速辦小舟頻往返及今精力未全衰

謝王粹中惠白鶴山麟川觀斑竹杖竝竹輿

麟川仙館翠琅玕荷子攜來白鶴山未效葛坡龍種化

金匱要略卷之四
絕勝湘浦淚痕斑。裁為拄杖一尋許。巧作乘輿四尺慳。
兒子門生俱努力。病夫欲過虎谿還。

曾無逸郎中名燕居曰和三續社有詩次韻

欲和會三

家以續
雙林

通地通天祇箇中。千岐雖別大都同。兩家偶爾流傳盛。
一貫臨之內外融。欲境掃開心在我。浮雲散盡月當空。
感而通者後來語。不感須知自有通。

老來

老來何以度光陰祇有圍棋與鼓琴
碁為心勞疎對局
琴因臂弱倦調音
曲肱時復同尼父
面壁何妨學少林
氣習未除祇自笑
又還弄筆動微吟

長生草

玻璃擢葉玉蟠根
千里提攜寄海濱
雨澤不霑仍自潤
土膏無著自長春
歲寒秀色鎮依舊
日暖素英能一新
我欲餌之求久視
恐君靈已不靈人

謝黃汝濟教授惠建茶竝惠山泉

幾年不泛浙西船每憶林間訪惠泉雅好誰如廣文老
親攜直到病夫前細傾瓊液清如舊更淪雲芽味始全
或問此為真病否其中自有石如拳

史子仁碧沁

相家本有四明山更葺桃源渺莽間四面樓臺相映發
一川烟水自彎環

中川累石勢嵯峨城上遙岑聳翠螺舊說夕陽無限好
此中最得夕陽多

題趙晞遠二畫

藻翻數尾已如生妙絕魚兒作隊行不是深知濠上趣

未應筆底得縱橫

魚扇

牕前驚見一枝斜照眼英英十數花千載簡齋僊去後

何人更著好詩誇

墨梅

送陳表道倅岳陽

垂上青雲去如何乘貳車輕為千里別時寄幾行書剗
劇才無滯傳家學有餘當塗足知己應不費吹噓

聞說巴陵好樓高占古城湖光千頃白山色一螺明赤壁沈沙戟蒼烟老樹精好詩收拾下寄我慰離情

元珍弟酌別賦此贈之

歸來十暑又三霜衰病那知謁帝傍採菊初期老陶令種桃應是笑劉郎不辭白首登黿禁正欲青衫及鴈行今夕團樂同醉後未知何日駕歸航

靈芝寺

送客靈芝寺憑欄山有無自從朝北闕始得見西湖烟

外移輕槩波間浴野鳬清寒不可駐回首又神都

閭丘醫視脈曰老人之脈如小春有感

老去光陰似小春如何比得少年人君看桃李秋風後
縱有花開不是真

貢闈對硯盤發歎

老去未忘黃與朱琢成三硯樂閒居豈能更作諸生業
但欲頻看後世書視草北門才已盡持衡南省計尤疎
便須再挂衣冠去約汝同歸故草廬

次韻李孟遠使君與林雪巢子季武詩

古梅巨石瞰清池，觴詠曾陪老啓期。
別我遂成千古恨，傳家空有一篇詩。
使君尚爾悲陳迹，處士惜非同時。
若使南樓預清賞，胡牀應奉庾元規。

玉堂早起

早起多奔走，旬休亦往還。
偶因二士試，始得一朝閒。
靈鵲花枝上，金魚荇蒂間。
素餐終有媿，只憶舊家山。

贈徐松

我為浮名媿引年老餘八十尚飄然不如合卻談天口
歸向白雲深處眠

經筵講詩徹章進詩

聖主承丕祚于今歲幾遷昭回光飾物剛健位乘乾善
治新更化當陽獨攬權誅鉏及共鯨擢任列閔顛曩日
方謀始宸心最急先未遑親政理首務關經筵恭儉甘
卑室尊嚴拱細旃晝居勤已甚坐侍禮無前講徹詩三
百時逢運半千諸儒深誦說六義極摩研俯閱毛公傳

旁參鄭氏箋慨尋中古意重是素王編舊本三千首終
存十二篇雖遭煨燼厄三賴詠歌全開迹因農事安民
在井田成功時邁酌興業大明縣東國思平賦南山樂
得賢艱難由后稷勞來美周宣起自紹熙載迨茲嘉定
年關雎從肇彼殷武遂終焉寵數傳中旨恩光被邇聯
神文期繼踵元祐信齊肩內廡頌雲騎雕輦絢錦韉茗
分龍焙品香拂御爐烟衆俊咸宣力孤生亦備員少時
曾學詠老去未忘筌納祿誠休矣歸耕久晏然鋒車俄

促召梓里謂登僊詞禁容揮翰天官命典銓豈知侵暮
境重得侍甘泉朽質何能報孱軀殆欲捐尚思求謫諫
海嶽效塵涓

題天竺珪老復菴

路從天竺更微南衲子邀余過復菴八法照人瞻睿藻
一峯當戶擁晴嵐寄文初動玩羲畫萬物竝觀師老聃
六用不成均此理楞嚴容我為同參

為倪正甫尚書題壯懷堂扁以詩來謝次韻

久矣君宜任弼諧果隨驛召上天階幾年不作相逢夢
一日俄傾積別懷情厚夫君幾鮑叔愚如老我類高柴
他時戶冊高懸後直欲扁舟訪水涯

攻媿集卷十

欽定四庫全書

攻媿集卷十一

今體詩

送趙德老觀文東歸

宋樓鑰撰

趣還宗老侍經筵宿望訐謨信偉然引疾屢煩頒漢制
賦歸先已買吳船去年趨召叨同傳今日求閒媿著鞭
未得相隨出關去羨公徒御若登仙

往還不過酒三行成敗同觀碁一枰東海敢言成二老
西湖自足度餘生竭來便覺廢茲事歸去定須尋舊盟
錦里錦坊秋色裏夢魂先已到江城

送倪正甫尚書守南徐

君如春柳我如松晚歲重逢意逾通日日公餘搜理窟
時時史暇樂談叢友朋罕有心相照兄弟惟應姓不同
此別未知何日見摻袪無語對西風

滿腔忠膜與嘉謨空洞他無一物餘有語莫非憂國志

欲行猶上薦賢書已欣勇退成清節更喜高眠即故廬
廊廟須公經濟手不應歛惠向南徐

幾回去國向吳興出處雖高事不平茲以優恩臨北固
不妨禁直寓西清羨君決去行何速媿我求歸計未成
溯水東西又千里壯懷堂上未忘情

戲題十四弦

十四朱弦欲動時泛商流羽看瑤姬弦疏不隔如花面
聲急還同墮馬兒谿蟹霜餘紫密網簷蛛雨後理輕絲

曲終勸客杯無算一吐空喉醉不知

樞密新府

平生苦欲住山間每恨家居不傍山
游倦忽來參宥密公餘卻得對孱顏
援琴萬壑自同響緩步一丘猶可攀
信美終非吾久處乞身惟待老鄉關

門號簽書府心存攻媿齋倚欄臨曲沼
拄杖看懸崖槁葉鳴輕雨殘山擁半階
退公成吏隱足以暢幽懷

大雪趙振文寄詩言乘月泛舟清甚次韻

老我心知筆力衰
頗欣臘雪瑞清時
三茅奇觀亦難遇
白玉峯頭燈萬枝

萬玉真妃搖珮琚
梁園授簡屬相如
莫嫌一水限吳越
兩岸交輝合太虛

雪光絕勝水銀銀
未覺仙家隔一塵
真境宜君著佳句
賞心樂事更良辰

見說中宵泛綵舟
何人同賞大江流
陽冰伯雪應為伴
更約禪人白道猷

舊聞老具擅詩聲夜泛錢塘向鳳城今日清游更豪逸

雪花和月帶潮生

法具字圓復紹興初詩僧也有月夜游錢塘江詩云小舟為我載月白色

沙翠竹光相射自從李白下金陵四百年無此豪逸

酒邊戲作

未年六十已言歸七十重來自覺癡未報君恩歸未許
樽前羞聽摸魚兒

葉處士畫貂蟬喜神見惠

重煩妙手費丹鉛貌出衰容信宛然君看頭顱已如許

豈堪頭上著貂蟬

頃游龍井得一聯王伯齊同兒輩遊因足成之

路入風簾上翠微老龍蟠井四山圍水真綠淨不可唾

一作水從何來不知處

魚若空行無所依勝處雖多終莫及舊游

誰在事皆非祇今匏繫何由到徒羨聯鑣帶月歸

海潮圖

錢塘佳月照青霄壯觀仍看半夜潮每恨形容無健筆

誰知收拾在生綃蕩搖直恐三山沒咫尺真成萬里遙

金闕岩嶢天尺五海王自合日來朝

題施武子所藏醉白堂記

有序

醉白堂記相臺舊刻已不多見施武子得太清樓所藏真蹟一代奇寶也魏王尚友香山坡翁詞翰兩絕畫錦故居昔嘗以假吏過其門巷恨不一到其處太清圖書流傳至此撫卷無非可歎者事至今日歎又不足為之慟哭可也

堂名醉白尚存不詞翰輝光射兩眸天下曾除蘇氏學

禁中卻有太清樓舊碑于世已難見真蹟惟君乃得收

感歎不堪衰淚落林慮山水空流

魏王以相州城中無水于林慮山引

水入城貫第中溢為灌溉之利

謝雷季仲樞密惠社餅

寵分餅卷荷深情割肉烹鮮不厭精
潭府始知嚴社祭衰門又得詫侯鯖
洗杯用薦逡巡酒下箸如餐骨董羹
回首粉榆未能去欲隨秋燕問歸程

婁彥發參政

八月二日壽詩有序

某伏承生申之旦正得秋而萬寶成真是一年
好處中秋佳月浙江大潮皆每歲所有芙蓉菊
桂俱不復重陳今則實惟巖壑所誇一百省歲
之時況值合宮大禮儲君受冊前星誕育昴宿
凝祥相去只五十間賓僚惟公為舊學都省後
堂祝壽之儀久不講此公首當之今又以慶朝
按試鼓吹嚴警場輒成唐律發樽前一釐

青宮冊寶盛朝章玉佩珠旒照日光儲家久資三善得

生朝相去半旬強五千餘卷學尤富一百省年身更康
都省先曾同舉酒貢闈最喜又傳觴易逢皓齒今歌曲
難值嚴更聽警場慶事方來真可卜祝公黃髮相虞唐

題孫谷橋墻間圖

墻間不足又之他猶自施施驕室家齊國一人如許爾
寧知後日事如麻

因知義利本殊途莫笑墻間乞祭徒正使往來多顯者
此中尤要著工夫

肆赦小雨

時章達之樞密在麗正樓上禮畢戲謂余曰君雖長未免雨立歸遂成小詩

端門宣赦樂欣然膏澤還應降九天始覺耳邊鳴
槭槭漸看笏上溜涓涓我班金闕闌干側君侍玉
皇香案前雨立固知同陛楯一言猶幸賴優旃

題桃源王少卿占山亭

納納乾坤一草亭西山盡見若秋屏
霜餘遠水呈天碧雨過遙空現帝青
逸叟真成陶令隱高懷長似屈原醒
肯堂固賴賢孫子精爽猶疑尚有靈

題汪季路侍郎所藏吳道子天龍八部

妙絕天龍八部圖
細看真不失錨銖聲
名自足高千古
題品尤難遇
二蘇旌旆冕疏猶可想鬼神人物亦何殊
君看坐位蘭亭草費盡工夫學得無

二蘇謂子美子瞻也

謝顏樂閒篆離騷

樂閒下筆素推高
攻媿耽書老更饕
顧我好看秦小篆
煩君為作楚離騷
晚年應悟成蠲扁
痛飲猶堪寫鬱陶
喜劇但知歲十襲
瓊瑤無以報投桃

題徐聖可知縣所藏楊補之二畫

誰種疎梅古岸頭推篷瞥見倍清幽
君看竹外一枝好真有江南萬斛愁

梅花屢見筆如神松竹寧知更逼真
百卉千華皆面友歲寒祇見此三人

嵩岳圖

有序

先祖太師齊國公元符中知河南府登封縣建
炎兵燬先集故物煨燼無遺兒時猶及見揚州

伯父藏嵩山圖丹青僅存雖傳錄廿四峯詩以
生晚既不逮事不知有石刻也張致遠為京西
僚屬寄登封舊碑得之驚喜唐律為謝

先世前蹤不可追君從何處得全碑上橫嵩岳三千丈
下列齊公廿四詩室號揖仙懷舊事菴名面壁認遺基
青氈真是吾家物欲以瓊瑤厚報之

寫照葉處士求僧

幾年依樣畫葫蘆自作葫蘆學佛徒一筆從今勾斷了

一瓶一鉢任江湖

元日

歲當庚午旦庚寅最喜明朝遇上辛五福來臨吳越分
更欣三日即頒春

題郭恕先雪霽江行圖

妙絕丹青郭恕先幻成雪霽大江船沿流更飽輕帆舉
上水仍勞百丈牽捩拖長年渾欲動褰帷佳客若將仙
侍親曾泛滄浪月猶記蘭成射策年

十八歲時侍先
太師行大江

寄題江西劉氏勤有齋

樸斲數苗皆用勤
況吾儒者務多聞
萬書插架非關我
一卷入心方屬君
為學從來無止法
立身寧祇富多文
自憐習氣今猶在
尚欲楚膏到夜分

書葛氏詩卷

詩有致仕心
開十首

來年六十蚤休官
海角投閑儘自安
一紀時容奉香火
七旬遂許挂衣冠
重來深媿妨賢路
此去終期保歲寒
三上封章歸未得
葛家詩卷却羞看

殿上聞杜鵑

衰晚三年侍玉墀高梧又擢鳳皇枝封章屢上未容去
更向殿頭聞子規

王伯齊染髭

垂髻相見舜江濱荏苒俄驚過五旬顧我顏齡真似葉
訝君長鬣亦如銀萬金安得神仙藥一笑重來舊日春
縱使星星還復出不妨時作少年人

乞出過傳法聞伯齊歸姚江

扶病還朝一禿翁重來寧免笑何公夢魂長是尋雲北
歸路何時向浙東深願聳身隨畫鷁空勞舉目送飛鴻
主人竹所終須到最憶東軒一枕風

行香聞杜鵑

牆西綠柳杜鵑聲我老何堪側耳聽我自賦歸歸不得
不須苦語更丁寧

送蔣錫若水使屬北行

曾為假吏到燕山送子長征不作難故國能無歎禾黍

中原應欲覩衣冠
黑甜軟飽宜加愛
紅皺黃團正可觀
行矣勿為兒女戀
指期良月待君還

夜讀王承家縣丞詩編

向來深夜快揮犀
不聽清淡又許時
淨洗昏眸急呼燭
為君讀盡一編詩

鍊句工深興味長
固知家學富青箱
莫言一嚮能嘗鼎
更欲為余傾錦囊

寒食

輔政無功日歎然佳時頒賚屢傳宣已蒙授策仍分茗
既荷貽年更擊鮮流號流香盛寶檯燭然新火散青烟
兒孫不識君恩重但覓東宮賜劇錢

夫人攜家泛湖

三分春色二分休始見魚軒泛綠舟諸子待行歡盡日
一翁獨坐淡于秋滿斟美酒應同醉是處名園為少留
陰靄在前雷雨後特晴此日稱君游

即事

壯志推顏貌亦衰
豈知官舍傍巖隈
此身不是京塵裏
飯了沿山看臘梅

劉寺即事

不到茲山二十年
豈知重見舊山川
煙深雖不見湖水
且看長空萬里天

飛泉何事仰空流
無數明珠散不收
注輦昔時曾撒殿
至今拋擲未曾休

漳發漕薦喜而成詩併勉杓

戊辰貢舉忝余知曾礙孫兒到省闈欣汝今秋重預薦
喜吾即日可言歸門闌有慶人爭賀父子同登世所希
痴望十人俱上第坐令晝錦倍光輝

十月旦尚煖用夾公服二月初吉雪寒甚服單

尚煖先添夾方寒卻用單不惟春料峭況值雪飛翻但
欲朝儀肅難求已分安衣囊如欲懶歸去老江干

從子淮過省寄伯中弟

我家伯父德餘輝吾弟風標具體微七葉欣聞五爭奮

四人先喜一雄飛忍貧老尚甘簞食教子今方擢省闈
他日雙椿臨六桂麻衣俱換綠衣歸

贈僧文可往黃州建東坡寺

一坡久矣郡城東居士來游地望崇問舍求田煩作計
拈槌豎拂看談空共分龐老沈江寶要奉儋州禿鬢翁
去作開山第一代燈燈相續到無窮

三月七日上賜牡丹並薔薇露勸酒

幾見牡丹東海涯暮年敢謂到京華休論千品洛中譜

驚看百枝天上花
況有八珍來禁苑
更加雙榼賜流霞
闔門飽暖聊同醉
稽首將何報宅家

史清翁談詩走筆次韻

公退門庭靜
輕風輓絮毬
故人驚一見
小酌散千憂
西上不容久
東歸又別愁
何當附舟尾
從此遂歸休

以興安石院底寄顏樂間

興安樂石響于桐
作院猶堪繼仲容
茂苑樂閒真好事
為君添起玉玲瓏

觀冷泉亭放水

冷泉淺濁使人愁開板黃波去不休岸側細泉穿亂石
始知別是一清流

贈蜀二史

有序

紹熙四年蜀士李德秀甫登科求致其事以榮
親先帝詔從其請某時任西掖預草詞命令皇
帝策士蜀又有二人焉同姓史氏其一緜州司
戶天應與其子箕同登遂以身之官求封贈父

母其一成都府司戶公亮自陳素志晚得一官
亦為此舉上益嘉之各特循從事郎致仕聖朝
孝治之盛十九年間見此三人坤維士風于是
尤振輒成唐律表贊喜之私仍寄后溪劉德修
老我挂冠慚復彈羨君登第遽休官幸哉有子事尤美
專以為親人更難舊說三賢皆特操今看二士倍榮觀
同歸猶及襄陽老一舸清風廿四灘

題汪季路尚書所藏米元暉蔣山出雲

龍盤往昔名鍾山雲起從龍意自閒膚寸須臾成戴帽
坐看膏雨滿人間

九月十一日杓孫得男

郡齋弧矢記垂門今日衰翁更覺尊生晚不能瞻大父
年高卻喜有曾孫從今鏡鑷知無用但喜芝蘭近愈繁
願汝孳孳守家法為傳衣鉢到仍昆

送叔韶弟宰華亭

試邑雲間事最多直將心力細礱磨固知三泖五茸勝

其奈千瘡百孔何
敏手未須施霹靂
疲民正欲聽弦歌
規撫穩作三年計
徐上青雲鬢未皤

又示從子澶

壯縣人歌第一奇
過庭為有寧馨兒
親旁色養宜加謹
戶外分毫勿預知
寓意杯觴須自節
讀書松竹有餘師
他時刮目相期待
連桂家風望一雙

寄叔韶弟

阿連試邑有成規
誰謂雲間不可為
能使鑊湯偏滾處

直如官府太平時容容非欲後多福赫赫何如去見思
子路當年曾請益更須無倦以終之

朝退

謝事不得去趨朝愈更難誰憐八旬老日冒五更寒指
凍怯持笏腰酸強踞輦細思誰縛汝只合挂衣冠

劉德修赴遂寧示和篇改除荆南復寄之

老矣思歸缺屢彈七旬望八合拋官我將東去計安出
君欲西還事亦難好向渚宮尋故蹟更從雄楚縱遐觀

上游正倚公為重莫向蓬谿更上灘

李起宗舍人悠然亭

遠游蜀道歷艱難徑上甘泉豹尾間荷橐忽思辭北省
拂衣自喜見南山當時旁舍基猶在回首垂髫鬢已斑
先友碑陰盡陳迹寒空依舊濕煙鬟

伯中弟可休堂

夫婦老相對閨門貧甚安六兒俱力學一子幸仙官香
火祠初奉勲名鏡裏看更當聯五桂納祿尚何難

海棠

海棠昨日始萌芽一夜驚雷發萬葩
老眼恍然何所得
凌雲庵外見桃花

海棠初發為題詩倏見輕紅萬點吹
已惜落英鋪滿地
更憐幾片罨蛛絲

後圃

春雨才晴氣已和暖風吹動百花窠
絕憐玉屑如吾髮
綠者全稀白者多

贈熊道人

十載隱潭衡居然肺腑清
枯禪參懶瓚老氣激彌明
筆底煙雲妙人間勢利輕
款門俄告別江海一浮萍

借韻

題汪季路尚書所藏米元暉湖山瑞雪圖

筆力誰能似虎兒
思陵親為御珍題
小臣不識湖山好
但欲扁舟泛剡谿

揚州瓊花

回憶靈根六十年
秋深恨不見芳鮮
茲從淮上來千里

非比人間聚八仙曾有畫圖稱小異諒應后土愛孤妍
或言天杖誠虛語榮悴中分亦偶然

題林宗魯校書所藏宣和御畫

周公多藝孔多能徽廟才高更倍增除却萬幾都不會
至今遺老話昭陵

贈別章茂獻尚書

我輩重來鬢已皤正元朝士苦無多才堪柱石猶歸去
奈此摧頽一老何

戲咏戎葵簇成芍藥

回首閒來婪尾春橫風吹盡已成塵戎葵簇就誰當巧
紅藥當前太逼真觀洵贈人迷冶子翻階得句誤詞臣
園丁妙手有如許猶勝隋園剪綵人

戲題膽瓶蕉

垂膽新甕出汝窑滿中幾英浸雲苗瓶非貯水無由罄
葉解流根自不凋露綴疑儲陶令粟風搖欲響許由瓢
相攜同到綠天下別是閩山一種蕉

午暑

炎官火傘罩中區
病老低垂氣不蘇
難學孫兒頻飲冷
時將冰水洗霜鬚

省宿

樹滿茅山綠正肥
昏鴉日日向南歸
如今身在三茅外
卻看歸鴉正北飛

水蕉

獵獵水芭蕉
如將隱士招
清風來處遠
溽暑坐中消

送楊晦叔提舉浙西竝寄陳表道

兩兩郎星映使星
老人星彩對晶明
褰帷共喜行畿甸
洗印仍欣就帝城
五馬況當恩始拜
三吳從此政尤清
便看瑞慶求稱壽
同聽崇呼萬歲聲

八月四日晚霹靂碎大柳木

秋分雷自合收聲
白露明朝忽震霆
怪得坐中驚欲倒
鄰牆萬柳碎中庭

靈光

魯邦宮殿久蕪荒惟有靈光最久長身似靈光終變幻
歸然別有一靈光

謝陸伯業通判示淮西小藁

四海詩名老放翁遺編俱在迹成空忽從淮右傳詩卷
近比劒南真父風暫向壺頭追馬援何當甫里訪龜蒙
江山為助多佳句莫惜南來寄斷鴻

蕉菴清坐

薄晚歸來煙已蒼蠻蕉一葉障斜陽不須久住潭潭府

始覺山林興味長

蕉菴暮歸

綠蕉陰下遶斑衣
飯了從容到夕暉
老子才攜筇杖去
孫兒各捧竹團歸

病告

閉戶垂簾儘自如
兀然終日擁紅爐
得歸足可優游老
此地何堪養病軀

殿上侍立寒甚

小雪以來霜氣清今朝寒色倍嚴凝
榻前侍立無遮障
吹得半身真是冰

齒落戲作

零落殘牙齒年來落欲空
得魚惟食凍捨肉只餐葱
休憶紅綾餽難吞栗棘蓬
何須如劒樹如解振宗風

重陽澤生日時年四十九矣

汝生四十九年春猶記雙親始得孫
當暮知非過能寡
敢言學易道彌尊
喜吾父子為知己
賴爾詩書遂滿門

但得團樂長似此年年莫菊醉清樽

范叙剛舍人示文正公象笏

千載威名文正公忽瞻遺笏照雙瞳
敢從象齒窺清裁屢批龍鱗奮大忠
秉立定知端若柱至今猶想氣如虹
舍人接武登廊廟宜寶甘棠振祖風

送黃貞護道人住茅山贈以黑玉虎

少從黑虎谷中行晚得於菟王琢成輟以贈君俱隱處
大茅峯頂看風生

贈凌一源道人

知君曾住武當山更解尋幽瀟皖間
老矣無緣窮勝處但思歸去臥鄉關

謝滕宰彥可惠詩

與君相遇海東頭明月如何忽暗投
自媿重來千歲鶴永懷靜對五湖鷗
新編不覺成三復妙思誠堪比四愁
還肯來遊鄒山否與君攜手上東樓

薊林雪中過峽圖

不土之里無言詩泛雪清圖事已非墨隱為君傳舊跡
宛然興起剡谿西

賀監湖上

萬頃平湖一葦杭此歸喜似賀知章上恩賜與西湖曲
遂老吾家歸照堂

狂客歸來終好夸越王城下占烟霞此中信美非吾土
不是西湖是我家

攻媿集卷十一

欽定四庫全書

攻媿集卷十二

宋樓鑰撰

今體詩

殘月如新月

近晦月猶在蕭騷夜向晨已殘幾欲盡忽見恍如新老
桂沈清影餘輝釦半輪纖纖兩頭玉皎皎一鉤銀明似
哉生際光疑太逼真妝樓誰起早深拜誤佳人

笑背俯晴軒

笑背情方適融霜日正燠何妨憑曲几相與俯晴軒愛
景欣亭午閒身得負暄映簷成白醉挾纈謝奇溫豈止
寬寒色猶思奉至尊桃花滿肌骨佳句憶王孫

置酒沛宮

漢祖功成後時因過沛宮還鄉上心喜置酒故人同高
會延遺老酣歌和衆童窮歡新笑樂起舞舊英雄慷慨
悲遊子軒昂賦大風永為湯沐邑何用築新豐

天寒割蜜房

場圃功初畢，天寒樂歲穰。
山居收蜜課，簷外割蜂房。
弱羽依晴日，纖腰怯曉霜。
鉛刀開戶牖，棘七薦甘香。
作室何時再，趨衙未用忙。
百花辛苦處，今日為君嘗。

黃知橘柚來

一舸放長江，遙林底處黃。
自知來橘柚，先已照滄浪。
綠葉凝烟密，金苞射日光。
相迎蒼縣雨，暗識洞庭霜。
味詫江陵種，庭垂禹廟荒。
何如船上看，數里更飛香。

背水陣

十里當勦敵臨機事寢危葦山兵已遣背水陣尤奇前
澤書誠有行權我獨知正須投死地何用惜羣疑拔幟
終如約傳餐亦應期孫吳非紙上方略要從宜

鯤化為鵬

鯤大幾千里揚鬣氣二增一時俄化羽萬古記為鵬鱗
族疇能比龍門不足登天池將轉徙雲翼快飛騰怪矣
齊諧志壯哉莊叟稱鳶飛與魚躍曾不事誇矜

一月三捷

勇甚鷹揚將身從虎穴探六師心不二一月捷凡三戎
卒時非久邊庭戰已酣神戈窮逐北露布屢馳南貌旅
彌思奮狼心敢肆貪七旬有苗格較德可無慚

清泉潔塵襟

騷客事幽尋清泉一派深居然浮爽氣聊用潔塵襟
徹底明蒼翠澄波漾碧岑應添山澤趣盡滌市朝心洗耳
何妨聽吟詩更喜臨至哉天下樂穩坐讀書林

物色訪巖光

肥遯推巖子招賢仰漢光營求思舊物物色訪羣方聘
問期終得形容尚未忘羊裘方審識蒲乘遂搜揚不羨
雲臺繪還歸釣瀨傍高風今尚在江水與俱長

冀北馬羣空

冀北雖多馬未知伯樂工祇因良種去便覺舉羣空遍
視千蹄衆先收八駿雄漫聞餘布野無復見追風騏驎
方奔逸驚駘豈混同倘非承一顧鳴意孰能通

習馬長楊

強漢承平後兢兢武不忘整師臨五柞習馬向長楊冀
野來騏驎天閑出驪驪騰騰射熊館馳驟華山陽輦路
千蹄穩瑤池八駿良上方勤閱武願賦翰林章

飛泉漱鳴玉

翠巘幽深處飛泉觸石鳴跳珠無定態漱玉有餘情雨
落千尋溜風傳萬壑聲玲瓏鏗壁韻激濺破瓊英漢水
思遺珮滄浪想濯纓何須韓吏部聯句賦琮琤

表兄陳安行遷右司仲兄遷大理丞余遷太府丞
舅氏適齋寄詩為賀次韻

東塾談經歲月輕外家生長復何營王生此舅若無有
楊惲一書安得成首寄新詩欽厚意卻思往事念平生
當時更荷外祖母幼惠尤憐盛氏甥

為親敢說宦情輕公退委蛇懶自營朝路一時偕寸進
適齋新句已先成園師況復今同里武子非惟愛外生
舊日阿童今欲冠此恩更欲到彌甥

適齋挂冠次韻

致仕吾非不待年
禮經自合許求田
孤圖徑取衣冠挂
不願更尋香火緣
富貴鼎來先避地
是非叢處獨翩然
鄭峯相對兩真隱
共仰元台為大天

世事相牽無了期
平生待足是何時
拋官不作九閭夢
納綠尚餘三徑資
紫綬金章寧復戀
黃冠野服自相宜
耳根贏得長清淨
理亂從今不用知

余初除西掖適齋惠詩以二甥相繼續綸為喜安

行表兄貽書喜溢于辭謹次韻為謝竝屬安行

漕臺生處寢之牀叢桂還分一葉芳紅藥階邊懷老謝
桃花觀裏憶劉郎首煩賢舅書增喜想見慈親色更康
無忌安能真酷似願從外氏借餘光

敢謂封倫據此牀幸從科級紹餘芳紫薇繼直中書貴
叢桂猶為同舍郎太史書傳得楊惲渭陽情厚為秦康
外家宅相君餘事魚目何堪比夜光

余旬郡得娶適齋以詩相迎次韻

風際端宜鷁退飛青雲高處有危機屢遮西日成何事
幾向東風詠式微塞馬云何真是福鱸魚正不為知幾
休論池上翩然舉且奉潘輿得賦歸

適齋約訪王卿正己已而中輟次韻

歸來親戚話通情準擬流光得再行已荷適齋容接武
敢從酌古遽渝盟烏衣門巷人非遠綠野樽罍計未成
官已得閒身未暇因仍恐或過清明

謝太守送雪次適齋韻

一冬祇見曉霜寒未得飛霏萬里看多謝黃堂贈圭璧
欲從乳竇倚欄杆簾高安有冰成柱坐久空餘水在盤
歲晚願呈三白瑞要觀積玉滿林端

清高閣觀雪次適齋韻

衝雪上層閣真成清且高主人風節峻坐客笑談豪
泛棹訪安道賦梅思水曹好因牕映夜痛飲讀離騷

真率會次適齋韻

喜奉潘輿得退身烏衣相會總情親樽前正好醉千日

林下何妨見兩人閒暇止應開口笑詼諧尤稱掇皮真
夜歸更作驚人語舅氏從來筆有神

楊聖可基集余方歸自桃源不及預次適齋韻

屏處尤便野性慵故人何幸得相逢賦歸敢慕陶彭澤
自免猶希邵曼容基酒交歡情正洽江山得助景方濃
嗟余誤入桃源去歸路滿城聞晚鐘

汪達可招遊臧園次適齋韻

城下名園稱老懷乳鶯飛燕共低徊寒梅送臘曾先到

嫩綠留春喜再來眼底芳時能幾許樓頭衙鼓漫相催
主人好事不嫌客素壁揮毫又一回

滿架酴醾慳雅懷更添林下紫徘徊平湖不怕重門阻
勝賞何妨後日來酒興已隨斜照遠詩情無待片雲催
黃昏鼓棹欲歸去望望烟林首重回

士穎弟作真率會次適齋韻

何羨祖希情好隆朱陳累世意交通舅甥巾屨頻相接
兄弟樽罍喜更同參坐幸容攻媿子主盟全賴適齋翁

日來愈得清閒趣斗酒不妨時一中

弔王卿之喪次適齋韻

去歲同登百尺樓相期春晚更重遊舟藏大壑夜俄去
橋跨清溪花自流五紀情親真是夢四山風物總成愁
一朝千古尚何及空使文皇嘆薜收

喜雨次適齋韻并呈郡守吳居甫

一旱禱而雨此心天與通為霖三日足起舞萬家同破
塊朝方爽翻盆夜正中隨車真響應巫覡又何功

洗印日無幾載，艾春已移。龍神來鄮嶺，香炷藝流陂。自是受屢許，堪為學稼遲。洋洋添野水，已足樂吾飢。

雨師爭目效風伯，尚何施膏澤。由分閭空餐，愧奉祠農功。今可濟水利，更無隳喜雨。無煩記行人，口似碑。

安行表兄除華文閣直學士奉祠次適齋韻為賀
屢報銀臺給事中，忽聞喚渡浙江東。長安幸免手遮日，圓嶠莫嗟船引風。廩繼真祠身暫逸，班聯內閣眷方隆。且歸同伴適齋老，便看鋒車召此翁。

送安行表兄葬次適齋韻

深沈仙洞鎖神清萬壑松聲不似晴宿草他年空悵望
生芻今日寓精誠山川氣象渾如舊劍佩風吹儼若生
猶記玉音稱酷似始其無忌乃其甥

尋春次適齋韻

一自東皇天上來坐看芽蘗起枯荂化工潛有洪鈞轉
春事何勞疊鼓催晚景鬢凋寧再綠去年花謝又重開
賞花攜酒那容緩走遍郊原莫便回

曉來陌上雨斑斑同社相將便出關
席地亦堪尋酒所得園徑與坐花間
從教多病須行樂任是清貧也破慳
門外紅塵深幾許誰人能得此身閒

次適齋韻十絕

休官

人生寧問草堂資乞得閒身且徑歸
慚媿舅甥俱就隱淡然相對兩忘機

發書

故人惟賴幾行書今日誰能更訪吾
舊日熱心今就冷
向來已得自揶揄

見客

客至何妨送與迎
門前羅雀亦人情
可憐寒士猶相望
時有饑來柳絮輕

出謁

杜門卻掃寢多時
閒傍人門亦漫為
茶竈筆牀烟浪去
自疑身是老天隨

赴會

此身未老已先閒到處時時盡醉還更欲相邀蓮社客
共尋精舍上孱顏

病起

老去情懷百不宜上樓腰腳覺舒遲適齋異稟人難及
病起精神略不衰

安心

但使心如水平在樂坐令四體自然胖有人來問安心法

將汝心來為汝安

讀書

佚老無如大字書聊將遮眼度三餘有時忠義忽相激
間遇包胥與子胥

染鬚

染鬚欲學少年時笑殺當年榮啓期公道世間惟此耳
年來猶幸不相欺

修養

聞道壺中別有天，能將俄頃比千年。
千年俄頃俱成夢，只任天真卻晏然。

同年鄭貴溫寺丞直華文閣致仕次適齋韻為賀
先生久矣愛吾廬，絕勝揚雄宅一區。
賸有珠宮來海石，不妨茅屋繞畦蔬。
來書已許尋前諾，結社方將約並驅。
更欲相邀預真率，車公豈可座間無。

倦遊歸騎自吳門，欲上封章叩帝閭。
俞旨肆頒旌素節，華文進直示優恩。
淵明妙句羣賢和，疏傳佳名萬古存。

加我數年祈謝事此心難與俗人論

次適齋韻四絕

初得曾孫女

外子惟知媿可攻羨公八十未衰癯曾孫喜見新文祿
尚想當年擲鏡翁

茉莉花

江南創見喜孤芳見說閩花徧海鄉安得一居香盛處
帳中巧作寶毬妝

從子澡滌築居荷池上

樓臺牆宇家家月楊柳荷花處處風最喜兩涯相映帶
一時倒影入池塘

山亭納涼

不嫌西照為朝曦城郭誰知住翠微天幸外門纔咫尺
欲陪杖履夜忘歸

次適齋韻五首

山行野老問年

田夫笑把褐衣牽，莫問壺中別有天。
齒髮雖殘渾未覺，精神愈勝果何緣。
公言已老偶能爾，我本無心只自然。
再禱百分纔及一，定因椿壽八千年。

堅鄭貴溫棊社

二公休致我來歸，儘可同裁隱士衣。
此已屢謀登竹所，君其無吝造城扉。
人間厭見手翻覆，樂處須當頭指揮。
涼氣一新宜近酒，盞簪莫似向來稀。

秋涼有感

公看魚躍與鳶飛鶴脰雖長斷則悲世事不容人苦較
秋風自有葉先知青奴難免交新絕素扇寧須手自持
宋玉賦片終未達不如老子笑成詩

諭悲秋者

黃雲萬頃一時收喜見高空風露秋歲事及今將告畢
人生到老盍歸休固知景物能興感亦有痴人苦過憂
胸次果然無一累豈容秋月使人愁

舅甥賡酬之樂

神明未覺晉公衰老母尤忻兄弟怡范甯王忱無許壽
牢之無忌不聞詩秋風對酒勸酬處夜月乘橋來往時
但要兩家同此適不須更遣外人知

八月十四夜攜家泛月次適齋韻

月到平湖金作波一城惟此占秋多水晶宮裏清無比
何用重登漢馭娑

九秋風月正分平盛滿水晶分外明老子此行端不惡
夜深幾得聖之清

稍先一日是中秋行遍芙蓉與菊洲作意安排卻非適
不如乘興徑行舟

猶記年時看水嬉不如此夜月相宜仙翁一醉非塵世
為問姮娥知未知

草草真成一段奇比鄰非不借餘輝板輿何敢侵風露
略望簷間且勸歸

次適齋韻十首

懶學仙家煉火還但欣晚節在林間鴛行免奏三千牘

鴛鴦難參十二閑短艇有時浮綠水輕輿到處賞佳山
莫言冷淡為生活冷淡終然無後艱

秋來病體費支吾深閉柴門臥草廬藥裏多尋醫者問
酒樽寢與故人疏特須勉強陪來客未免辛勤答遠書
此外儒生真氣習簡編猶欲趁三餘

大率舟行岸自移機緘何必更相思雨餘坐見水三尺
雲淨喜看天四垂荷沼已殘霜後葢桂林初綻日邊枝
閒中氣味深長甚問卻西風總不知

幸堪擊壤樂清時衰病情懷百不宜祇好灌畦陪漢叟
更欣學圃慕樊遲逢人草草須傾酒得韻忽忽且和詩
琴意高低猶自適高山流水久心知

甥舅相尋向酒邊相忘情話更怡然人言難遇雙延閣
自媿叨聯兩大天只覺光陰詩裏過何妨枕簟醉時眠
此中別有真消息莫為人間醒者傳

從來憂道不憂貧晚向閒中得此身直把宦途如夢過
任他世事似棋新坐間可說舊時話眼底幸多同社人

賡唱本求閒燕樂莫誇末路費精神

自憐鶴髮奉慈親舅氏還欣託比鄰已向雲間收倦翼
甘從波底作潛鱗果然松菊連三徑誰謂神仙隔一塵
野服相從成二叟不須更現宰官身

笑他咄咄向空書既老投閒計未疎釜裏有魚長自足
門前無雀是吾居休論仙子生塵襪莫問高軒織翠裾
百念已如灰樣冷更無驕色與人鋤

秋宵坐到玉繩低歷歷明蟾數桂枝重露半翻蕉葉徑

好風時颭豈花籬不妨起舞弄清影何用撞鐘誇小詩
濁酒困人垂欲睡更揩病眼一揚眉

秋到先生舊草堂涼飈林葉已飄黃漸看天宇清霜肅
更覺人家白晝長歷世已經三折臂坐愁何必九迴腸
世間舊事消磨盡祇有詩情未遽忘

客省中次適齋韻

三年此日綺筵開盛意勤拳不待催豫約行人須已集
先欣數客肯俱來詩筒纔到先賡韻酒興方濃莫算杯

更欲秋深窮勝跡鄒枚後乘可容陪

花若開時定自開芳心深靚不容催上人又有新詩出
佳客應尋舊雨來樓上已聞香撲鼻堂前儘放酒盈杯
高燒銀燭照花睡便到更深亦願陪

定數無過偶與奇達人循順更安時不于椿菌量長短
豈為彭殤較疾遲雖是一時身有疾行開九秩壽無期
外生六十頭先白杖履相從最得宜

戲和適齋絕句三首

脫索

纏縛千遭趁酒巡環觀巧手競稱神莫言名利如韁鎖
猛烈抽身亦在人

藏摩

儘教逞技儘多般畢竟甘心受面謾解把人間等嬉戲
不妨笑與大家看

傀儡

假合陰陽有此身使形全在氣和神王家幻戲猶堅固

線索休時尚木人

晝寢正酣適齋以二十韻詩來亟為次韻

老氏正求知我希吾今老矣更何之極知仕宦皆由命
縱有功名已過時覽鏡形容寧復我還鄉交友定從誰
慈親多幸方難老舅氏猶欣未覺衰教誨至今仍似舊
襟期暗合自相知新詩必使篇篇和勝地還容處處隨
晝永劇談俱喜聽夜深清坐更忘疲素欽行己初無玷
願學持心不自欺紫橐清班叨預列黃金橫帶忝同垂

六旬顧我猶加懶八秩如公尚自持但仰三尊知共慶
孰云十拙敢輕嗤無情到此方為達省病從他不用治
世事只將同蝶夢人生幾得見雞皮觀書自識非求解
策杖徐行莫厭遲儉素何妨貧勝富優游真是樂忘飢
雖然調樂無干指儘喜當歌有十眉報謁要須親自到
赴筵直以散為期醉翁雅意非謀醉棊社清歡豈為棊
白髮只宜甘散誕紅塵任彼自奔馳安輿來往常陪伴
此意終身誓不移

次適齋贈少微兄韻

汪樓比屋古城隅彼此清貧不願餘
南阮諸賢今有幾東牀佳壻竟誰如
歸鄉年亦非全老對酒情猶未覺疏
來往兩家無倦色此身端合老犁鋤

桂花方開約客次適齋韻

久疑岩桂儘遲開留待來朝伴舉杯
老去欲尋千日醉客來同引百花醅
沉臨高閣枝枝秀好判閒身日日陪
家釀盡傾君不惜莫教瓶罄恥為壘

蔣德尚棊會展日次適韻齋

棊社經年能幾回身閒深幸屢參陪
一句又見朋簪集三徑還應聽履開
休苦索居徒面壁何如相遇且銜杯
雖有藥裹寬初約不碍重尋舊雨來

太上皇帝聖體清康老母進封信安郡太夫人適
齋除數文閣學士有詩為賀次韻

清朝孝治古無倫通籍推恩總及親
八秩升班惟二老九齡拜命更何人
春初慶席歡猶在歲晚宸綸喜共新

須信長年多富貴祇因同見會昌春

吾母年高絕等倫痴兒何幸得榮親九重錫類真千載
八座承恩只一人共仰外門流慶遠喜同介弟寵光新
兩家盛事人爭賀和氣薰為臘裏春

題曉上人閒靜軒次適齋韻

我居城郭子居山兩地相望數里間我已得閒猶未靜
子雖處靜不曾閒莫將花與夢相似只用心如石樣頑
要識箇中真信息孤雲僧寺兩相關

次適齋韻十首

棊會

歸來鄉曲大家閒同社仍欣取友端無事
銜杯何不可有時會面亦良難少曾環坐坐常滿
賴有主盟盟未寒琴奕相尋詩間作笑談終日有餘歡

老態

舅甥身退不為遲肥遯猶當未老時東晉雖慚古元亮
晚唐知慕老天隨公開九秩身方健我甫六旬心已疲

不敢自言成酷似腹心惟喜兩相知

晨朝懶起

坐見一翁兩鬢皤只羸曉夢到無何
牕涼風透真成適
日出事生還更多足弱已難堪蠟屐齒搖初不為鄰梭
回思螭陛班心處日日奔趨向馭娑

見客

車轍常多長者臨相過肯笑席門深寒暄固有三分話
臭味還傾一寸心客至自應閒不厭年來寢覺老難禁

應酬既了無餘事面壁何妨學少林

晝寢

才盡甘為世所捐不如高臥了餘年時逢毀譽心無諍
間有詩文手自編老去已知身是夢閒來更得酒中天
簾深午寂渾無念只與白鷗相對眠

喜閒

投閒時以醉為鄉人既相忘我亦忘雨足已期南畝熟
風清更愛北牕涼晝觀碧落雲千疊夜看中庭月一方

時撫素琴聊自遣誰能更作鳳求凰

杜陵鄭老共襟期門外紅塵勿預知近日頗荒攻媿課
多時不見適齋詩竹深荷靜相留處月白風清偶會時
地僻衣裳俱自懶黃冠野服淡相宜

讀香山詩

詩到香山不計篇相逢佳處輒欣然明知無子可傳業
每遇為文自入編舉世慕名多諷誦惟公著句得純全
胸中相似詩方似一等不為名利牽

即事

旋插杉枝蔽曉曦
緩搖輕簟自融怡
調琴不用求成曲
得句何須湊作詩
無復趨炎同襍穢
但能尋睡學希夷
太倉日糴五升米
老矣不嫌人更嗤

西山

兩岸杉松翠蔭長
輕輿連日得徜徉
絕憐林下朝還暮
不問人間炎與涼
睡起閒情方自樂
齋餘歸路未須忙
何時更向月溪去
願著青鞋走侍旁

燕居

大老今居東海濱
燕居晚歲更申申
外生但喜長依教
一笑相從莫問貧
閒裏只將詩作活
酒邊猶有筆如神
乞言授几俱休論
且做羲皇以上人

子成兄年八十六
史子久八十二
舅氏八十八
會于適齋次適齋韻二絕

堂中三壽喜同時
黃髮相逢齒更兒
參坐共談宣政舊
風流不許後生知

間里舊遊能幾人適齋猶有筆如神莫言二老升沈異
各現宰官居士身

攻媿集卷十二

欽定四庫全書

攻媿集卷十三

宋樓鑰撰

今體詩

陳文懿公

居仁輓詞

衆口推文伯何人識吏師義襟惟古有心地只天知至
死終無玷平生本不欺在公無可憾猶恨哲人萎

珍館徑歸鄞人猶望秉鈞郵傳千里訃哀動五州民躋

踊森賢嗣攀號感路人公乎不忘矣袞袞看簪紳
宅相惟公久伊余忝後塵十年追桂籍兩禁踵詞臣接
武參吾舅承顏奉老親幸成三學士何意失斯人
一別屢經歲歸舟已及門方期情話悅空訝語音存善
行傳千載蕪詞愧九原傷心歌楚些無地可招魂

邱文定公密輓詞

謀國規模闊絕人才具高三朝千載遇四海一身勞儒
將通駕序樞庭握豹韜皇家資柱石天遽奪伊臯

初擬文翁化誰知懷遠圖廟謨專制閭世將易兵符養
虎竟遺患斷蛇由不殊寧同死諸葛空恨失吞吳
處事拘攣外鋤姦談笑中幾年亡主將全蜀賴明公畏
愛盾衰日清和夷惠風屢書終不盡詩意亦何窮

王文忠公

十朋

輓詞

夙負敢言氣輸忠不愛身劉蕡仍遇主綺季更憂民治
行真循吏風稜古諍臣搢紳千載恨不得究經綸

梁木今其壞誰能問大鈞恩深兩宮賻哀慟四州民已

矣天人策傷哉社稷臣吾生良可恥不及見斯人

婁忠簡公機輓詞

壯歲志先定耆年氣不衰治高爲縣日名重佐州時雅
望登朝著忠言徹帝墀亨途日千里闊步不容遲

邊事繫初開惟公論不回深謀比婁敬極力阻王恢兒
戲何堪用冰山忽已摧朝廷始更化大老盍歸來

共政三年久蜚英四海尊色詞無假借風裁弭囂喧但
欲持公道寧容啓幸門經綸終未究猶有典型存

寮案侍儲闈如公久任稀載欣商皓起終惜漢疏歸問
字煩參訂談經賴發揮一書真總要星日重光輝
得姓共東樓同朝兩故侯文編叨二序誕日頌千秋老
矣俱宜去公乎不少留來書墨猶濕展讀淚空流

程文簡公

大昌

輓詞

仕宦接王楊諸公嘆老蒼門生多紫禁子舍屢黃堂自
得垂車樂誰傳邵老方桃花千樹滿空憶舊劉郎

徐邈今非介申張焉得剛立朝無附麗受謫更芬香戲

綵衣冠盛圍棊日月長典刑今已矣無復歸靈光
持論真遺直操心本至公羸貲寧市寵平冠不言功
光祿文階峻嘉興色養豐誰能死生際猶得教之忠
晚出荷公知登門未覺遲通班依漢橐試郡守蕭規藻
翰猶頻寄宮牆不再窺新阡何處是西望不勝悲

林正惠公

大中

輓詞

愛直趙清獻忠文范景仁累朝推舊德今日見斯人正
色欲廟上敢言寧顧身紫樞方大用惜不究經綸

去國名逾重還朝道益尊清虛懷骨鯁嚴冷帶春溫公
綽真無欲臧孫尚立言騎箕雖永隔精爽儼如存
凜凜古循吏堂堂真巨公死生忘度外邪正炯胸中憂
世心誠切籌邊事已空龜潭山水流淚與無窮

觀文殿學士陳公駘輓詞

台嶽鍾神秀居然社稷臣海涵書萬卷魁冠數千人南
服頻懷綬西垣屢演綸惜哉真漢相不遂秉洪鈞
幾見衣冠偉終聞羽翼成先皇崇舊學大政任名卿神

器親傳授崇朝再太平功成身自退寵利一毫輕
朝著登門久詞林辱眷深代言稱據古議禮許同心去
國臨歸路還家寄好音病中聞訃告老淚動盈襟

觀文殿學士趙公

彥逾

輓詞

千古盛周宗皇朝實比隆謂多擔貴爵誰見立王功一
語國先定寸心天與通龍飛稽事實信史詔無窮
授受唐虞際從容平勃間宗英誰柄用人望屬棹間晚
侍經闈讀寢登秘殿班帝鄉留不住歸去老湖山

麾節稱循吏三朝藹政聲治如黃霸最心慕伯夷清諸
道俱遺愛兩川尤著名起家臨制閫更羨錦衣榮
聽履領簪纓忠言徹帝城公方扶日月我亦寄雷霆憂
世形辭色卧家存典刑靈光更陳迹楚些不堪聽

端明殿學士汪公

應辰

輓詞

制閫詩書帥公朝侍從臣身能全進退人可得疎親曳
履聲猶在持衡迹遂陳從今幾百載更復見斯人

蚤歲聲名大婆婆始遇時難兄屏隔坐令子桂芳枝入

望還為用天胡不慙遺成蹊堪喻大墮淚不須碑
道學不盡試功名祇緒餘立朝惟正色薦士有遺書百
贖嗟無及九京誰與居莫酬推轂意哀淚濕巾裾

端明殿學士張公

杓

輓詞

○杓舊訛杓今據
宋史本傳改正

籍甚張京兆精神滿腹中才高解牛刃手敏運斤風河
潁恩波遠塵間狡穴空章臺舊時柳無復映金猊

英略古無對外庸今最良衆方期共政人已難云亡不
聽尚書履猶懷太守章匡廬星忽墮丹旒裊清湘

昔幸參朝列于公更有連規撫恢世界風義薄雲天送
別詩猶在貽書墨尚鮮偉人無復見惟務寶青氎

仲舅敷文閣學士汪公輓詞

籍甚牢之舅難追宅相風惟公能愛我獨我最知公潭
府書無繼西州事已空形容盡心力庶或慰幽宮

外氏桂成叢諸甥長養中名稱無酷似宦達偶相同澹
室既長往適齋俄考終絕憐三學士只賸一衰翁

樞密謝公

廊然
輓詞

臣主一意合風雲平地生立朝專論諫為國總樞衡行
矣登三事悲哉奠兩楹輟瓜恩意重終始備哀榮

千古台山秀名流列雁行惟公登政路一旦破天荒故
里空華屋佳城映夕陽送車無路到東望淚浪浪

尚書尤公

袁輓詞

敏甚五行下毫釐恥不知千人揮筆陣萬卷納須彌有
夏傳追蠡先秦拾斷碑鄴侯書插架分付稱家兒

憂國言多切回天力有餘衆推真學士上念老尚書直

道終難進高懷只遂初梁溪釣游處此意竟何如

舊學方登用公來領從臣未光依日月聽履上星辰共
政將圖舊騰章屢乞身甘盤終罔顯雨露未霑新

北面願師承東臺拜老成忘年容未坐叙契若平生風
月吟千首雷霆寄一名送車無路到寒涕為君傾

尚書湯公

碩輓詞

先正真良弼彤墀四拜麻決科承奕世摘藻擅傳家禁
路優持橐侯藩幾建牙相門宜出相恨不見隄沙

秦郎崇先契周旋古括州殿庭觀唱第海郡繼承流方
快飛騰上俄聞汗漫遊鳳凰山下路丹旆想悠悠

尚書張公

抑輓詞

文靖饒風度高皇記曲江賢孫真是似才氣號無雙幾
見持英蕩終看擁碧幢誠齋主詩社到此亦心降
撫字推循吏論思領從班宏才名北闕高興屬東山同
歲叨崇篤比鄰足往還舊遊成昨夢哀涕不勝潛

商侍郎

飛卿輓詞

矯矯真御史風生白筆端出持膚使節始著侍臣冠給
饌鬢先雪籌邊心為寒天乎驚玉折不及上金鑾
所至仁聲著甘棠幾去思敬姜嗟哭子伯道痛無兒郎
省傷連壁文闡見刻辭邊民紛墮淚忍讀峴山碑

顏侍郎 度 輓詞

宴坐勿菴上睇顏亦是顏平心真似水立說信如山屢
擁皇華節重登清禁班始終無玷闕風裁許誰攀

祿養嗟何及朝朝飯一僧移忠躬寢寢錫類日烝烝報

政優吳郡知賢仰阜陵清忠與公恕餘慶啓昆仍
贊倅丹邱日眼看康濟泉同朝叨獎與侍坐得周旋妙
畫多傳寶遺文合細編典刑今已矣西望涕潸然

曾侍郎

炎

輓詞

文獻南豐裔源流曲阜公巖巖雙法從凜凜舊家風金
玉方交映人琴忽併空平生心地直流慶尚無窮
紫陌尋春日惟公最少年鱣堂慚隗始熊軾媿盧前寄
我書猶濕思君迹遽仙同登今有幾揮淚撫遺編

少保李公

孝友

輓詞

戚閑疏恩厚勲門積慶餘弓彎飛將臂架插鄴侯書六
纛秦官重三槐漢相如惜哉終半日聞者為歎歔

錢殿撰

佃

輓詞

雋譽蜚庠校孤忠動冕旒救荒心欲斷憂國鬢先秋惠
滿長江水風清八詠樓禁途交一臂人物等閒休
粉社歸來晚翛然得故吾哦詩頻刻燭點易細研朱有
淚悲連壁無階奠東芻名門餘慶遠丹穴看奇雛

趙待制

粹中

輓詞

明主畫三接清班歲九遷一居周柱史徑入漢甘泉批
敕嚴東省掄材上小天平生經國志惜不冠貂蟬

詩近劉賓客手追歐率更雙旌古良吏萬卷老書生世
諦浮雲薄生緣曉夢驚吁嗟東向議何日遂施行

半世誰知己登門意氣傾交情忘父行文會忝余盟持
論先忠厚談經嘆老成幽光誰為發落筆淚縱橫

吳待制

博古

輓詞

御史再乘驄忠言沃帝聰處心平似水疾惡迅如風遇
合嘆何晚論思信有功惜哉辛佐治竟不到三公

三仕八儲闡堂堂來日飛初同四皓起終作二疏歸冰
玉清班近衣冠盛事稀聞君忽仙去西望是耶非

東甬預賓興文闈賴主盟菲葑無下體衣鉢有門生劍
佩今何處樽罍空復情自慙無報所老淚為君傾

楊待制

王休

輓詞

望重威無怒仁深勇有餘百年憂國志滿篋薦賢書德

政不勝載才猷未盡攄佳兒人物似真可大門閭

蜀道名天險馳驅敢憚勞劒頭懸六印夢裏益三刀漢
殿聯簪橐燕山擁節旄惜哉覘國意不得試龍韜

蜀用東南彥皇家屬意深貳卿頻報政上相最知心泛
宅俱杭葦同朝擬斷金廟廊期引類疾病兩侵尋

事契因同薦交情晚益親半生文會少萬里宦游頻別
後書猶濕歸來迹遽陳何能發潛德空有淚霑巾

許待制

尹輓詞

蚤擅文章價名公屢品題碑銘摹諫省邱壑訪愚溪得
句追飛兔擣毫走怒猊遺編聞好在後學仰筌蹄
十載更麾節陽春萬里同時時逢蜀士一一詰文翁到
處留遺愛諸郎守教忠慶源知未艾往日有陰功

陳秘撰

舉善

輓詞

陳氏多名德茲來慕典刑宮端驚宿草

謂邦彥也。邦彥名良翰官太

子詹事諡獻肅宋史有傳

秘撰又泉扃自古有遺直祇今誰獨醒蒼

蒼何可問耆舊日凋零

跬步不忘孝掇皮皆是真移忠思致主務實見臨民三
諫言猶炳平生迹遽陳清風凜衰俗自足盪秋旻

王給事

信

輓詞

主眷逢千載龍光傾一時銓曹著官簿禁掖粲英詞論
議推東省威聲懍北夷平生經世意懷卷竟何之

宦學素稱豪仍聞吏事高精神雖腹滿撫字亦心勞藩
輔連三組沈疴見二毛胡牀庾樓在殘月墮江臯

余給事

崇龜

輓詞

烏府仍螭陛銀臺更掖垣事幾無弗論外似不能言厚
德鎮浮薄平心剗劇煩用才殊未盡無地可招魂

桂籍兄聯弟蘭階子克家上恩嘉踵武京秩為增華朝
著蒙傾蓋綸闥覩判花遽成千古別南望想悲笳

史敷文

彌正

輓詞

八行諸孫盛三公嗣子賢連收四鶚薦祗欠一書氈郎
省刑章肅侯邦政譽傳平生憂國意齋志入重泉

學問源流遠樂哉賢父兄人琴亡舊曲風木愴寒聲深

痛幾成毀沈疴汙喪心孝恭無可憾猶得傍佳城

少小相從久自慙鳩甲辰交情日加厚姻好晚逾親別
去驚葭律歸來見棘人西莊行樂地望斷為沾巾

袁府君 文 輓詞

家學傳三世几間無二書力行真勇猛進取故舒徐前

輩多遺墨先人祇故廬後來窺甕牖

○袁文字質甫有雜著一編名曰甕

牖間評 志士為歎歔

坦坦幽人履恂恂長者言憂時見顏色樂道竟邱園隱

行推同氣高賢萃一門四明耆舊傳他日數諸袁

周路分

良臣

輓詞

蚤負功名志從戎豈素心治軍先肅靖游藝亦精深
海開豪氣雲天廓義襟高門尚餘慶蘭玉正森森

台嶺論交契天街惜別離飛書能幾到埋壁遽成悲
識歸樵句

在丹邱時探梅浮江李使君有樵字韻詩公和篇最工云卻從谷口問歸樵

愁看

結局詩紫髯無復夢空有淚交頤

趙左司

鞏

輓詞

行誼高餘子文章自一家
嶽神均客禮敵國歎才華
直節曾無苦全瑜更不瑕
儒流有遺恨不見草黃麻

淮甸爭錢幣夔城辦戎兵
詔歸南郡近公去北門輕
避寵若將挽求閒竟不成
亦期無適莫一笑老於行

許國終無撓居家不願餘
深蒙明主眷未覺故人踈
高論三千牘陰功四一書
佳兒承積慶端可大門閭

鄉貢早馳譽郎潛方比肩
求仙容我學成佛嘆君先
天癸年將暮金丹語未圓
忽傳長別偈天闊散雲烟

王提刑 正功 輓詞

廉白真家法原由金紫賢兄辭嶺南賻弟卻豐陽錢築
屋吾將老藏書手自編老成俄已矣聞者為潸然

籍甚青箱學醇乎赤子心片言皆可復一偽不容侵處
事幾游刃論交欲斷金諸郎傳素業桂子看成林

二廣外臺首威棱著一門志期諸郡肅忍見匹夫冤奮
擊猶鷹鷂興讒有兔爰投閒了無限此意與誰論

伯仲三珠樹優為一世才人琴先起恨金玉遂俱推南

阮方深痛阿連尤可哀桃花源上路老眼更堪開

王大卿 正已 輓詞

少壯節先著年侵氣不衰忠雖由父教清亦畏人知處
世無求合安時竟數竒甘泉人物會一老漢空遺

麾節東南半澄清冠一時權輿周翰傳頂踵阜陵知自
謂二宜去人稱三不欺卷懷終未盡流慶稱家兒

圖史但環堵江湖幾問津雖多暮年樂誰忍半年貧海
內清名滿毫端秀句新風流嗟頓盡晉韻更何人

老去王摩詰歸來道更全
賸添天美祿真得地行仙
日欲增三徑君胡欠百年
桃源不無路重上慘風煙

劉吏部侯輓詞

總角異羣兒庭趨蚤學詩
一鳴登桂籍百里靜潢池
所至清民瘼平生號吏師
郎闈方進用何乃棄明時

劇劇最雲間題輿上越山
洞庭王澤遠庾嶺使星還
中道趨臺治名曹切近班
陰功多及物陽報看循環

誰擾奚山衆焚林獸已窮
徙新能遠慮下瀨得深功
南

嶠肩隨息中朝論愈公但知分謗喜寧肯自論功
兄長與慈恩相親色笑溫公方持使節余忝代王言共
約遊三徑俄悲作九原佳城隔風浪丹旒愴飛翻

朱南劍輓詞

再世文章伯三朝侍從臣傳家推篤學遊宦肯謀身別
駕歌章水甘棠想劍津虛堂兩遺像誰不倍傷神

朔望第一客巡察意更親有詩欣和韻不飲喜娛賓名
帖藏中古珍茶試早春據窳猶矍鑠何遽迹成陳

綦戰久不對詩盟亦寢寒方期會真率乃爾變悲歡歲
晚本無憾情深忍那看佳城何處是東望淚汎瀾

石南康

塾

輓詞

挺挺石可轉恂恂意不勝平生憂國志長夜讀書燈大
易窺三古中庸進百能惜哉天不憖無復見川增

家有春秋學淵源更得師風高蓋公舍淚落蔡邕碑官
早終難進才全竟弗施遺編屬賢子孝謹不應衰

伊昔為君御儒流賴主盟執經容後進傾蓋若平生坐

見埋黃壤空勞望赤城友朋相與泣反袂不勝情

鄭華文 若容 輓詞

蚤擅春秋學賢關第一流少公清澤國贊府著神州試
邑人交薦還朝譽更優如何急流退不使上瀛洲

籍甚柯山政兒意識貴溫

○本集有賀鄭貴溫寺丞直
華文閣致仕詩貴溫當是若

容之 字 歡謠聞魏闕殊寵鎮吳門就養家傳子休官澤及

孫吾鄉耆舊傳千載德彌尊

兄弟忝同登論交最有情顏波知勁節徹底嘆真清正

爾尋姻好胡然喪老成抱疴難執紼揮淚望佳城

袁通判章輓詞

大道知如路一心長似齋耄期稱不倦宵次樂無涯孝
謹古難及友恭人自懷無瑕夜光璧黃壤痛深埋

盛德不容贊多言可奈何大圭原不琢古井竟無波前
輩苦凋謝後生誰琢磨同庚適齋老託體共山阿

僅有一區宅曾無二頃田相過惟載酒至老不言錢幾
得拜狀下何堪哭道邊門人多著籍下馬向新阡

張工部

季樗

輓詞

忠簡傳清白家聲屬弟昂惟公殿諸老積善見多遜兩
桂昌書種雙椿藹慶門壽終無可憾況有典刑存

壯歲登郎省旌麾歷五州仁聲號循吏治行最諸侯憂
國言多切籌邊慮更周積薪無恨望終老得夷猶

敕局同寅舊雌堂屢肯過故人今有幾朝士更無多問
信書猶濕相望鬢已皤忽聞埋壁痛薤露不成歌

高端叔

元之

輓詞

百氏極旁搜潛心老不休鄰光時自照簞食誰堪憂弟
子多藍綬先生竟白頭淒涼數間屋知我獨春秋

鐵石賦梅花閒情白玉瑕兩公終磊落千載敢喧譁清
節成瑰偉浮詞尚蘄芽君看死生際不見一毫差

滿卷變離騷歐公一素袍豈惟將厚意要使句殘膏宿
草成千古生芻為一號雖無韓子誅貞曜本來高

趙提刑 子濛 輓詞

毓秀從天派盱衡動至尊使星方炳耀卿月遽侵昏已

矣悲吳館誰歟護北門慶源流未艾文獻霽諸孫
處事才游刃論文辯祭花英姿凜熊豹健筆走龍蛇持
橐身終外垂車夢到家平原花木在愁絕舊生涯

客授早登龍襟期一笑同門清心似水論正氣如虹近
問書猶濕重來跡遂空無因送丹旄老淚灑西風

李撫州

庚輓詞

與物初無忤臺評反謂傾麾符成漫仕林壑寄平生跪
履嗟何晚揮犀空復情天台隔風浪無地拜佳城

李下真無徑門前可設羅詩如翰林逸書似鄴侯多奇
字今誰問遺編尚不磨從來好哀輓薤露忍興歌

蚤歲文聲振長沙見賈生積薪看晚輩推轂致名卿子
舍真連壁生涯付短擎風流今李漢極口贊冰清

張欽州舟之輓詞

少誦東牕句從君見典型義襟希竇十才刃比庖丁古
鏡悲鸞偶寒原愴脊鵠恂恂守家法蘭玉滿階庭

姻好自諸馮東狀取阿戎平時深念我晚歲忍銘公書

字今猶濕心期誰與同回頭三十載灑涕向西風

錢江陰必輓詞

庾嶺梅花暖賢侯惠愛深精神雖滿腹撫字亦勞心九
轉竟難遇二毛何處侵傷哉東逝水無復大江陰前知南安

軍移知
江陰

客授向東甌君為郡督郵豈惟寮契篤更喜吏才優每
歎頻年別俄驚一夢休虞山渺何許淚落不能收

李刪定叔益輓詞

積善務增厚求名惟恐多白圭寧有玷古井竟無波議
法資修定監州極撫摩佳兒傳素業留眼看巍科
冰玉心相照誰云內舉私深居無浪出清節畏人知尚
憶紫芝字無慙有道碑填空雨黃葉西望不勝悲

樊運使

光遠

輓詞

科目公餘事南宮第一人七閩新使節三署舊儒臣倦
拜方辭餽哀良莫贖身家聲知有繼仙桂兩枝春

模浦云亡後斯文付此賢命其隨道喪學又絕心傳河

洛湮來派西州憶舊緣傷心者老盡揮淚對霜天

丁寺丞

允元

輓詞

家世傳經術膠庠藹雋聲上方思舊學公乃擅專城
上功尤著潮陽政愈明良哉鶚流水猶解不平鳴
嚴冷不可向其中實曠然行藏睽素志燕樂了餘年
鶴化人何處鸞孤影自憐才高不盡用流慶尚綿綿

曹工部

耜

輓詞

箕穎文章士儀同社稷功惟公承慶裔有意振家風祠

祿真崇道郎潛嘆老馮傷心循吏手齋志九原中
宦達推公早丁年備皂衣幾為銅虎去終向石橋歸齊
國世臣少貞元朝士稀松風談笑地回首倍歔歎

范致政錡輓詞

義俠久無迹吾鄉見此翁紫微欣稅駕飛將許同功銀
茜聯恩渥金蘭藹義風雖增羸博恨猶喜桂成叢
酒後昇平曲閒中安樂窩千金曾累致一醉竟無何老
驥志空在孤鸞悲亦多相望纔歲許託體共山阿

梁審計

季琦

輓詞

壯歲嶄頭角夷途試著鞭羣公爭倒屣諸老亦忘年
論議傾朝譽功名短世緣神傷賢伯仲風雨夜無眠
壽夭固難問吁嗟不忍言嬰啼摧玉樹衰淚灑芳萱
事契深羣從英才愴九原悲吟慙楚些無地與招魂

呂從德

畫問

輓詞

劇劇推才刃臨機妙斷輪傳家得清白滿腹是精神
未上金閨籍空留花縣春善人陽報在蘭玉正詵詵

回首情親處相過瀨水陽十年能幾見一疾痛云亡縣

郭山空秀家園橘自霜主人今已矣鷗鷺亦淒涼

王縣尉

彥正
輓詞

幹蠱恢才刃誰能貨殖私人皆競毫髮我獨破藩籬風

雨空殘夢池臺愴昔時板輿臨穴處行道亦興悲

潤屋公餘事能為人所難蓼莪遺恨在夜雨舊盟寒家

有書堪讀囊無錢為看情親悲不那望絕旖飛丹

唐舍人

闕
輓詞

鴈塔名三世螭坳侍九重循循儀學館諤諤囊著封至
性悲三釜高懷薄萬鍾典刑傷不見哀涕忽無從

夷路方馳輿甘棠喜問津廟廊平日志露電百年身拙
掌雖多恨為箕自有人發棠陰德在陽報質蒼旻

徐少卿

子寅

輓詞

聖主一言寤長淮千耦耕山川皆在目草木尚知名盍
被腰金寵徒為攬轡行諸郎襲餘慶定自繼長卿

所至多遺愛丹邱最有聲奉常千載久攀戀一城傾已

恨數離別寧知隔死生湖邊舊門巷一到一心驚

陸提刑沈輓詞

數馬謙恭甚揮犀色笑溫風流士龍裔文采左丞孫晚
幸成三徑身胡遽九原素欽仁者勇大嶽竟平反

早歲擅詞場夷途列鴈行一麾分楚甸雙節照江鄉蓮
社容寒晚葭莩接老蒼八旬俱已矣回首倍淒涼

陸參議沈輓詞

中外衣冠盛流傳識後凋聲名三語掾身世半身寮寶

晉書尤逸坡仙隱可招梅溪殘月墮蕪沒舊風標
飾吏先儒雅低徊五十霜荏蒲掃韶石桑柘滿黃岡知
已平津老家傳刪定郎八龍無半在風雨夜侵牀

蔣慈谿

鶚

輓詞

伊昔丹邱去相逢意氣傾樓前巾子秀山下育泉清敬
梓情逾厚交梨論益明淒涼千古意潮落又潮生

下筆欲生風磨礱日有功推敲詩益練駢儷語尤工經
問南雷叟家傳十八公詞人誰可繼文陣滑稽雄

吳大監

飛英

輓詞

庠校聲名早朝廷譽望尊忠言如日皎笑語若春溫四
擁皇華節屢登金馬門用才終不盡流慶在仍昆

曠典將行日南宮得舍人銓衡輕易地造化漫勞神舊
事誰能記交情獨我親吁嗟三昧手不見掌絲綸

俞通判

茂元

輓詞

強仕賦歸去頻年亦漫行宦情雖淡泊官事極精明贊
畫王公幕監州亞父城佳兒守遺訓清白勝金籬

象邑推三俊靈光賴此賢老成俄已矣遠邇為潛然孝
敬心何極公平錄尚傳佳城隔風浪忍賦薤歌篇

陳崇道輓詞

學造龜山蘊詩傳汝水餘于公足陰德陶令竟閒居白

業追蓮社丹經授寢虛

其父號寢
虛先生

平生了無恨善類勿

歆歆

未第聲先振纔官節已奇精誠與神合陰行畏人知晚
境終無玷遺文尚可師功名齎志歿回施稱家兒

鮑潮州浦輓詞

三試皆前列一官何後時
低徊廣文舍齟齬使君麾
遇事有如燭衛生寧及葵
舊游成隔世流涕讀新碑

客授壬辰歲巍科盛永嘉
芹宮屢揮塵竹院幾烹茶
假守深交誼清談及道家
猶懷郡齋晚羣雀噪簷蛇



攻媿集卷十三